

Prodots da lana sun in moda

Premi d'innovaziun per la Butia da besch ad Ardez

La Butia da besch ad Ardez ha survgnì il premi d'innovaziun 2016 da la Regiun Engiadina Bassa Val Müstair. Üna part da la lana da la bescha dal cumün vain elavurada in quista butia a stinvs, chapütschas, cuvertas ed ad oters prodots dal minchadi.

L'allevamaint da bescha ha in Engiadina Bassa üna lunga tradiziun. Ad Ardez abitan daplü beschs co persunas: 400 abitants possedan intuoit 600 beschs. Intant cha la charn d'agnè es da quist temp retschera nün es la dumonda per prodots da lana uschè gronda. L'intent da la Butia da besch ad Ardez es d'elavurar la materia prima da la bescha indigena a prodots da qualità, e quai per grond e pitschen.

Mantgnair las cugnuschentschas

Chapütschas, stinvs, figüras da fieuter, cuvertas, plümas, pels da besch e lana in diversas culuors as chatta illa Butia da besch ad Ardez. In ün chantun, davo il taler, sezza Annina Tönnett e fa culs spait. Il taler svesa es, sco ch'ella manzuna, be d'ürant singuls dis da l'eivna in funcziun. In tuot sun 13 duonnas da la regiun ingaschadas in ün o l'oter möd a favur da la Butia da besch. E minchüna dad ellas ha si'incumbenza. Fieutrar, tesser, far cul spait, cusir e far servezzan da butia tocchan pro lur lavuors quotidianas. Inizianta da quist proget e presidenta da la Società Butia da besch es Claudia Janett d'Ardez. «Nossa lana vain in ün prüim pass lavada ed elavurada in üna fillandaria da lana i'l Partens. Landroua faina lura ils prodots finals cha nus vendain in nossa butia», disch ella. La gronda part da la lavur culla lana da besch vain fatta a man ed uschè



Annina Tönnett (schnestra) e Claudia Janett in lur Butia da besch ad Ardez.

fotografia: Annatina Filli

mantegnan ellas quistas cugnuschentschas da l'elavuraziun da la lana da besch eir per l'avegnir.

Elavurar la materia prima

Immez Ardez, ingio cha las vias sü da Scuol e nan da Ftan as cruschian, as rechatta la butia culs prodots da lana da besch. La butia es adüna occupada cun üna da las 13 duonnas. «Tant ils giasts sco eir ils indigens chi vegnan pro nus in butia pon eir verer co cha'ls singuls prodots vegnan fats», manzuna Claudia Janett. Daspö la stà da l'on 2009, cur

chi's vaiva drivi la butia, vain elavurada üna part da la lana d'Ardez in cumün. «La bescha vain tusa duos voutas l'on e quai dà mincha vouta üna gronda quantità da lana.» Plü bod gniva surdatta quista lana a la Centrala svizra da lana o cha la lana gniva büttada davent. «Eu d'eira adüna da l'avis chi füss da far alch plü radschunaivel cun quista materia prima.» L'anteriura butia «Mengiardi» d'eira daspö ons abandonada e Claudia Janett vaiva l'impreschiun cha quista localitè füss il lö ideal per vender prodots da lana. Hoz vain ella sustgnü-

da da duonnas in tuot las etats e dals differents mansters. «La gronda part da nus ha svesa a chasa bescha. E per tuot-tas dess esser la lavur per la società ün guadogn superplü», declera Claudia Janett.

Sviluppar prodots novs

Las duonnas da la Butia da besch ad Ardez sviluppan adüna darcheu novs prodots. «In collavuraziun cun üna designa da textilia vaina sviluppa nossa giacca da lana. Quist prodot vain fat cun lana da nossa bescha e la floudra es

Premi per ideas innovativas

La Conferenza da presidents da la Regiun Engiadina Bassa Val Müstair ha surdat in mardi saira il premi d'innovaziun 2016 a la Butia da besch ad Ardez. Cün realisar l'idea da quista butia han pisserà Claudia Janett e seis team per üna spüerta attractiva. Plünavant s'haja procurà per üna spüerta innovativa e mantgnü plazzas da lavur illa regiun. L'intent dal premi d'innovaziun es d'onurar interprais e portaders da prestaziuns innovativas chi pisseran per üna spüerta o prodots particulars, chi promovan l'economia e chi mainan creaziun a valor in Engiadina Bassa e Val Müstair. Plünavant vöul la Regiun Engiadina Bassa/Val Müstair promover cun quist premi potenzials regiunals in resguardond ils principis economics ed ecologics. (anr/afi)

da lana da merino», disch Claudia Janett, «pel mumaint es quai nos hit chi vain cumprà fich suvent.» Per ella es important da restar actualas culs prodots e da fuormar adüna darcheu alch nov. Quai vain lura fat in collavuraziun cun perits d'utrò. Cün ir dals ons es dvantada la Butia da besch ad Ardez eir ün lö d'inscunter tant pels giasts sco eir pels indigens. «S'inclegia cha nus profitain eir cha'ls prodots da lana sun darcheu gnüts in moda. Impustüt las chapütschas fattas a man sun pel mumaint fich retschera.» Uschè daja eir darcheu blera glied chi fa svesa quists prodots e chi'd es in tschercha da lana in da tuot las culuors, sco quella chi vain spüerta illa butia immez Ardez. «La gronda part da noss claints sun giasts e proprietaris da seguondas abitaziuns chi vegnan fingià daspö ons qua pro nus.» (anr/afi)

Mordrià, mangià e discus in Val Müstair

Actuors han preschantà ün TatortDinner i'l Hotel Helvetia

Sonda saira ha gnü lö üna sairada divertiva da Tatort a Müstair. Eir ils giasts han tut part activmaing al evenimaint special.

SELINA BISAZ

Musica da Pink Panther resuna. Ils var 70 giasts sun plain tensiun. Che capita i'l toc «O Canada! – pitschens mordrantsch tanter amias»? La saira dal TatortDinner i'l Hotel Helvetia a Müstair ha cumanzà davo ün aperitiv in atmosfera prüvada. Tuot in üna jada sun apparüts las acturas ed ils actuors e sun its pro mincha maisa. Plan planet sun entrats ils giasts in ün'otra stanza, ingio cha'l gö principal ha gnü lö. Ils actuors han dit cha raps nu sajan mai ün tema. Ma els dumondan als giasts sch'els han tut cun sai lur buorsa. Plü tard, tanter ils divers trats, sun ils visitaduors gnüts a savair cha'l teater tratta d'üna sairada da «Charity».

Confusiun e dispitta

In quist teater «TatortDinner» vöul il COE-Venus Club Toronto ramassar raps per ün nov proget. Mary Santella ha giovà la manadra dal club. Implü han giovà Seraina Kobelt e Rahel Roy commembras dal club. La manadra dal club ha pisserà per cunfusiun e dispitta cun tour raps dad ün chirurg dad operaziun dad estetica, giovà dad ün hom our dal public. Eir Kurt von Suso sco hom da la manadra dal club



Perche es Olivia Brown per terra? Adrian Campbell, l'hom dad Evelyn Campbell, cuorra a guardar. Il schurnalist Andy Pipkin prouva da sclerir la situaziun. Charlotte e Rosie sun stuttas.

fotografia: Selina Bisaz

ha pisserà per dispitta. Rafael Luca Oliveira ha giovà il schurnalist da società chi'd es respunsabel per la reclama dal club. I'l toc as dumonda'l che lingias grassas chi chattan la via illa pressa locala. Il teater muossa scenas da schigliusia ed invilgia. Davo il mordrantsch ha cumanzà l'ingiviera,

insembel cul public. Inse voss minchün ün motiv. Uschè es gnü discutà e fat dispitta. Davo il dessert es gnü scleri il mord. Tuot la cumpagnia ha adüna darcheu ris e tut part activmaing al teater da Tatort. Quai es eir ün böt dal redschiss Florian Rexer e sia truppa da teater.

Florian Rexer es il manader da «Dinnerevents». Cumanzà vaiva tuot culs «Grusel dinners». «Dal 2010 n'haja fundà l'organiziun a San Galla», disch Rexer chi ha fat üna scolaziun dad actur e da redschia. «Eu m'interessava fingià adüna per teater, ma eir per la gastronomia. Uschè es gnü l'idea da giovar e

mangiar.» Giasts han lura ispirà al TatortDinner, cuntshaint da la Germania. Per la preparaziun dal TatortDinner i'l hotel Helvetia ha Rexer visità Müstair ouravant. «Eu chat bel da pudair giovar in uschè ün pitschen territori», manaja'l. Las prouvas han gnü lö a San Galla. A Müstair han els amo fat üna prouva generala. Eir improvisaziun saja dumondada. «Il menü discut eu insembel cul cuschinunz», disch Rexer. Il schef da cuschina da l'hotel Helvetia, Pierre-René Grond, manaja cha preparar e manar ils trats al dret mumaint sajan üna sfida.

Public activ

La famiglia Grond da l'hotel Helvetia, cun Anita, Pierre-René ed Olivier, han interess dad implir lur hotel eir illa stagiun plü quieta. Perquai han els ingaschà l'ensemble da Dinnerevents ed organisà il TatortDinner. Els sun fich cuntants culla saira. «Per part sun gnüts giasts da la Bassa aposta per quist evenimaint.» Florian Rexer e seis actuors han gnü plaschair cha'l public es stat uschè activ. «Quai es adüna eir üna sfida, nus nu savain mai co cha'l public reagischa», manzuna Rexer. Mincha regiun saja otra. La truppa sves deriva da Turich, Basel e Schaffusa. Mary Santella, l'actura chi'd es gnüda mordriada, ha gnü bler divertimaint vi dal gö. «Florian Rexer ha ün bun man per metter insembel il team», disch ella. Florian Rexer es adüna darcheu ispirà pel avegnir cun discuorrer culs giasts.

Daplü informaziuns sün www.dinnerevents.ch o www.helvetia-hotel.ch